

Suliffissuarnik sanaartornissamik pilersaarusiortoqartillugu kiisalu aatsitassarsiorfissanik imaluunniit pinngortitamik annertuumik atuinissamik pilersaarusiortoqartillugu Kattuffiit attuumassuteqarsinnaasut tamarmik Naalakkersuisunit tusarniaavigineqartarnissaat pillugu Inatsisartut aalajangiiffigisassaattut siunnersuut.

(Inatsisartunut ilaasorta, Aqqaluaq B. Egede, Inuit Ataqtigiiit)

Akissuteqaat

(Inuussutissarsiorermut Suliffeqarnermullu Naalakkersuisoq)

Aatsitassarsiornermi suliffissuaqarnermilu ineriartorneq inuiaqatigiit allanngortitseriataartitsisinnaanerannut tunngatillugu annertuumik piumasaqarput. Sukumiisumik illuinnaasiunngitsumillu innuttaasut ilisimatinneqarnissaat pisariaqartinneqarmat, aammalu tassuuna inuussutissarsiuutigut ineriartorneq innuttaasunik peqataatitsineqartariaqarmat Naalakkersuisut nalunngilaat.

Aatsitassarsiornermut inatsit pilersaarutit annertunerusut avatangiisinut sunniutissaat pinngitsooratiq nalilersuisoqarnissaannik (VVM) piumasaqaateqarpoq. Aammalu nutaatut pilersaarutit annertutillugit inuiaqatigiinnut tunngatillugu imminut nammassinnaassutsimik (VSB) nalilersuisarnissamik piumasaqaat ilanngunneqarnikuuvoq. VSB-p isumagineqarnissaanik piumasaqaat inatsisip § 1, imm. 2-mi siunertaanut atatillugu paasineqartussaavoq, tassuunani aatsitassarsiornermik ingerlatanut atatillugu ilaatigut inuiaqatigiinnut tunngatillugu imminut nammassinnaassuseq anguniarneqartussaammat.

Inuttaasut peqataatinneqarnissaat aammalu isummaminnik saqqummiussisinnaanissaata qularnaarneqarnissaa VVM-imut VSB-mullu tunngatillugu nassuiaammiippoq VVM aamma VSB saqqummiunneqassasut kalaallit aviisiat nuna tamakkerlugu saqqummersartoq Naalakkersuisullu nittartagaat atorlugit.

Aluminiuliorfiliornissamik pilersaarummut atatillugu 2007-ip aallartinneraniilli avatangiisinut siumut sammisillugu nalilersuineq pinngortitamut, avatangiisinut, kulturimut, peqqinnissamut nunallu immikkoortuinut il.il. tunngatillugu ingerlanneqarnikuuvoq. SMV innuttaasunik ataatsimiititsisarnepassuarni saqqummiunneqartarnikuuvoq. Tusarniaassutigineqarnikuuvortaaq aammalu kikkunnilluunniit takuneqarsinnaalluni aluminiuliorfiliornissamut pilersaarutip nittartagaani uani www.smv.gl.

SMV-mut tunngatillugu suliaq ingerlaqqippoq aammalu nutartigaq avammut inatsisartuni ukiamut suliarineqalersinnani tusarniaassutigineqarumaarluni. Nunatsinni NGO-t aamma IPO-t (nunap inoqqaavisa kattuffii) allat naligalugit tusarniaanermut

akissuteqaateqarnissamut periarfissaqassapput. Sukumiisumik tusarniaaneq inuinnaat naalakkersueqataanerannut aqutsinikkullu ileqqorissaarnermut ilaalluinnartuunerartariaqarpoq.

Namminersortuunerup eqqunneqarneratigut erseqqissumik aalajangerneqarpoq Kalaallit Nunaanni Namminersorlutik Oqartussat tassaasut aatsitassanik, aatsitassallu iluaqutigineqarnissaannut aalajangiisussat.

Naalakkersuisut NGO-t IPO-t attumassutillillu allat tusarniaanernut qaammarsaanikkullu ingerlatanut ilaatinneqarnissaat arajutsisimanngilaat. Taamatuttaaq Naalakkersuisut tusarniaasarnernik pitsanngorsaanerit ingerlappaat tusarniaavigineqartartunik ataavartumik ataatsimeeqateqaqattaarlunilu atassuteqartuarnikkut.

Naalakkersuisut tusarniaanermi tamanut ammasunik periusissanik nutaanik ingerlariaasissanik najoqqutassiorniarpur kisalu nunani allani tusaarniaanerni misilittakkat pitsaassutimut uuttuutaasinnaasut ilanngullugit.

Taamaattumik Naalakkersuisut siunnersuut akuersaarpaat siunnersuutillu akuerineqarnissaa inassutigalugu.